

COMUNICATO n. 2111 del 14/07/2023

Traduzione in ladino

Marmolèda, Fugatti: “Ge vel viver la mont, no la serèr”

“La crepes les é aló e les ne fèsc restèr encanté. Aboncont con sie esser, la mont la é ence pericolousa: l é lesc olache l risech l é. Embendapò nos no podon fèr auter che l azetèr, ma per chest cognon jir sa mont con consaputa e con ferstont”. Chest l é chel che à dit Reinhold Messner, l alpinist re di otmile che à tout pèrt enstadì a Cianacei a la scontrèda “Marmolèda, l davegnir de la mont tel temp del mudament climatic”, che à envià via i trei dis de scomenzadives per recordèr la desgrazia sozeduda l an passà, canche l é vegnù ju 63.300 metres cubics de giacia a na velocità de 50-80 metres al secont ciapan sot sacotanta cordèdes de alpinis e fajan morir 11 persones. “L recort l é n dover ti confronc de na comunanza che la é stata ferida tel cher” à dit l President de la Provinzia Autonoma de Trent, Maurizio Fugatti che te sie intervent l à recordà l gran lurier che à fat l grop de la Protezion Zivila del Trentin col suport de la realtèdes sudtiroleises e venetes per salvèr i ferii e per recuperèr i morc: “Se trata de 127 operadores che é jic sul giacé canche l é sozedù chest event, col didament de outra 96 unitèdes de suport. Te vegn i sgrijoì a pissèr che chesta persones à metù a risech sia vita, metan al prum post chi che era resté sot la giacia. Te chest moment la provinzia la controlea con sistemas de ultima generazion per veder se l é èga sotite la giacia, ma la mont ge vel seghitèr a la viver. La precauzions ge vel che les sie, ma dijon de no a la ideologies: la precauzions ge vel che les sie, ma tel medemo temp la mont no se pel la serèr”.

Per endrez del Comun de Cianacei en colaborazion co la sociazion “Ensema per Cianacei”, a la scontrèda metuda a jir te teater l era ence familières e amisc de la vitimes e i soravivui a la desgrazia. “Chi che desche me no à più zachei de cèsa che l é mort sa mont, enten de più che duc i etres che la mont raprejeta na dimenscion che va sorafora duta noscia capacitèdes de se fegurèr o de pissèr. No l é ira, percheche la mont no fala. Nesciugn podea pissèr o perveder n event de chesta sort sun Marmolèda. La giacia la é n muie sotila e l an passà l ciaut à fat acioche vegne ju l toch de giacia” à dit Messner, che l é stat intervistà dai giornalis Andrea Selva e Elisa Salvi.

Aldò de chel che peissa l studios de giacees del Muse Christian Casarotto, enceben che sibie stat straverç sul giacé, no l era elemenc che podea te fèr pissèr che fossa sozedù chel che enveze l é dalbon sozedù: “Demò tras n control specifich, che serf per binèr su dac de dinamica e moviment de la giacia, se pel descriver la evoluzion de la situazion. E la storia del giacé de la Marmolèda, olache no l é mai sozedù evenc de chesta sort, no giustificèa l cogner meter a jir chesta atività dant dai 3 de messèl del 2022. La giacia vegnuda ju l é un di fenomens che sozet te dut l mond, col smendrament del volum di giacees a cajon de la temperatures più autes, fat determinà da la prejenza del om che l é do a se slarièr semper de più”. Do che per rejons de segurezza l é stat metù su l raion checen sobito do da la desgrazia, chest inverna se à endò podù jir sa mont.

L ombolt de Cianacei Giovanni Bernard l à despiegà che “ai 3 de messèl, passà un an, sun Marmolèda se veit che l é neif ma l prozes de deslabeament no muda. Tras i relieves con strumentazion spezifca, la Protezion zivila la é do a controlèr la mont e aldò di dac biné su, cognaron tor su i provedimenc che serf. Dijon de no a serèr, ma volon verificchèr se l é la condizions per fèr prevenzion, enceben che se sà che no se pel meter en segurezza duta la mont”.

Tinultima, Paolo Grigolli, diretor de l’Azienda per l turism de Fascia à sottrissà che “ge vel mudèr la vida de jir sa mont, chieraian chel respet per l ambient che no veit più l om desche dominus de la natura, ma desche n sie element, descheche scrif ence Papa Francesch te la enciclica “Laudato sì”. Per passa doimile egn aon volù ruèr sul piz, ades cognon recuperèr chela sacralità de la mont che se vif te dotrei pèrts del mond. L obietif te chisc egn che vegn l é troèr n equilibrie, ence dal pont de veduda del moviment turistich sui territories de la Dolomites, e de esser bogn de viver en pèsc col ambient che aon dintorn”.

I evenc de recordanza i é jic inant te gejjia de S. Antone a Dèlba co la cianzons da mont ciantèdes dal Cor Valfassa sot la bacheta del maester Stefano Lazzer e la dì del cedean – ai 3 de messèl – sun jouf de Fedaa olache l é stat dit messa per recordèr i morc, do l é stat benedì na lèrga a l’averta dedichèda a la meditazion e a la orazions e olache l é stat inaudà na targa comemorativa.

Desèria l service video <https://we.tl/t-mFtsrpVHLX>

<https://www.youtube.com/watch?v=gu0-WfQd0K8>

<https://www.youtube.com/watch?v=Qm5hIAj3Z1o&t=4s>

<https://www.youtube.com/watch?v=6PVfP1XDt8I>

Traduzion di Servijes Linguistics e Culturèi del Comun general de Fascia

(cdt)